

Questa saira: Ils finalists

DA BENEDETTO VIGNE

La chanzun rumantscha. Cun intunaziun sin «la». Avevan nus basegn da quai? Stuevan nus copiar quai che las televisiuns svizras (ed internaziunalas) fan gia dapi onns, e quai cun legitimaziuns che sminueschan, sco che nus ve sain gist actualmain tar «Die grössten Schweizer Hits»? Ed in summa, n'avain nus betg gia la noscha chanzun rumantscha, dapi onns ed onns, pliras schizunt, il «Dorma bain», la «Lingua materna», «Il pur soveran»? Dumondas e dumondas. E lura pudainsa respunder

che nus avain fatg tut in pau auter, che nus avain mess il med dal radio en il center, che nus avain integrà apunta er las chanzuns tradiziunalas da chor e las melodias popularas rumantschas. E ch' a la fin sa tracti dad in giu, ina concurrenza ludica...

Ma lura vegnan autras dumondas: Pon ins mesurar las Liricas Analas cun il Alpina Quintett, pon ins metter *Carli Scherrer* sin in palc cun *Paulin Nuotclà*, astg'ins cumparegliar l'«Angelina» cun il «Ferm Tabac»? Ecco, perquai avain nus fatg tschintg differentas catterias: chantauturs, rock e pop,

Ils finalists (enconuscents a la fin da redaziun da La Quotidiana)

1. Il clom da la Greina (*Alexi Nay & Marcus Hobi*)
2. Jau ta n'ha jent (*Ivan Zangerle & Johnny Peterelli*; Diabolic)
3. Utschels da la not (*Reto Mayer*; Alpina Quintett)
4. La sera sper il lag (*Gion Balzer Casanova*)
5. Sch'eu füss 'na randulina (trad.)
6. Surses (*Curò Mani*)

Questa saira a las 19.00 vegnan presentads tut ils diesch finalists en il Radio Rumantsch.

Il final cun la tscherna da La chanzun rumantscha ha lieu la sonda saira dals 5 da december en la televisiun da la RSI (a las 20.40), direct da Lugano.



schlaghers, chors, melodias popularas – adina cun la resalva ch'i dettia pitschnas surtagliadas stilisticas qua e là. La variaziun stilistica procura la finala per il sal en l'ocurrenza. E sco gia ditg en auter lieu: I va sulettamain per la chanzun. Ma sch' i va be per la chanzun, fis-san las «Mias s-charpas» betg stadas la meglra chanzun dals Bulais? E pertge betg dapli chanzuns or da la retscha Top Pop, damai che quella figurescha sco project prezius dal Radio Rumantsch? Dumondas e dumondas. Sco resposta generala pudessins uss agiuntar qua la frasa standard: I dat milli gusts differentes.

La schelta da las chanzuns proponidas è vegnida fatga dad ina gruppada d'experts da la redaziun da musica dal Radio Rumantsch, e quella s'è basada da sia vart sin in'emprima glista extendida e sin propostas dad auditurs ed audituras. Infra las categorias èsi vegnì dà paisa da resguardar tant las differentas

regions, tant la vastadad da las singulas scenas sco er la dimensiun istorica da la chanzun. Ina tscherna democratica, per uschè dir. Ma nagina objectivitat assoluta!

La democrazia ultimativa sa reflectescha lura en il resultat dal televoting, la vuschada telefonica tras auditurs ed audituras. Ina davosa resalva damai: N'èsi betg da spetgar, causa da la differenta grondezza da diversas regions, ina surpaisa da vuschs sursilvanas gia en la preselecziun? La chanzun sursilvana empè da la chanzun rumantscha? Ils resultats gulivis da l'emprim'emna cuntradin a quest presentiment: Duas chanzuns ladinhas e duas sursilvanas.

Ed anc in'experientscha suenter mezz temp: Il public rumantsch telefonescha tut a dubel per sia chanzun preferida – el appreziescha damai l'ocurrenza da la chanzun rumantscha. Forsa gist perquai ch'igl è be in giu.